

مرند اۋىكو

Mərənd öykü



قارقا

يازار: فيروز رفاهى

Web address: www.marand-oyku.arzublog.com

Facebook: www.facebook.com/marandoyku

Email: rezaaydin491@yahoo.com

قارقا

فیروز رفاھی

ھاوا توتولور، آچیلیر. ائشیتدیگیمه گۆره هفته نین سونوناجان بئله قالاجاق. یازین بو چاغیندا بئله ھاوا اینسانا خوش احوالات باغیشلاپیر. یاخشیسى بودور کی، صاباح دا بیزیم ایستیراحت گونوموزدور. ایچیمدن فرحلمک گلیر. بیردن بیر سس ائشیتدیم. ضعیف ده اولسا ، قولقلاریم اونون یۇنونو و بویوتونو آیرد ائده بیلیر. بالاجا بیر شئیین دوشمه سینى باشا دوشورم. سس پنجردن گلیر. بیر باخیرام ائیوانا، بیر باخیرام اطرافا. بیر شئی گۆره بیلیمیرم. ائیوان بوشدور و اورادا هئچ نه گۆزه گۆرونمور. فکریم سسدن یایینماق ایسته ینده بیردین بیر گۆلگه سرعتله پنجردن یان گئچیر. بو ایسه منى پنجره یه ساری گئتمه یه هوسلندیردی. بئش-آلتی مئتیر آرالیقدا اولان آلچاق دمیر حصارین اوستونده بیر قارقا اوتورموشدو. اوزو منه ساری ایدی. باغچادا قارقا و قجلنین اولماسى و هردن سس کوی سالمالاری منى سئویندیردی. فیکیرلشدیم بلکه سوسوزدور. اولمایا نرده نین اوستونده اوتوروب منه هؤیوت-هؤیوت باخماسى دا اونداندير. اونون باخیشى منى بیر آز جین آتینا میندیرن کیمی اولدو. آخی نیه بئله باخیر. ائله بیل من اونا بورجلویام. باخیشى هردن مندن قاجیب یانا دؤنوردو. باشیما دوشدو کی، او بیر شئیی مندن گیزلتمک ایسته ییر. پنجردن بویلائیب دیوارا ساری قارقانین باخدیغى یئره باخدیم. گۆردوم قارقانین هؤیوت-هؤیوت باخماسى چاره سیزلیکدندير. دیوارین دبینه بیر جویز گۆزومه ساتاشدی. آرتیق هر شئی منه آیدین اولدو. سسین منشأیى ، قارقانین نرده اوستونه اوچماسى و بئله هؤیوت-هؤیوت باخماسى.

ایچیمدن جویز یئمک فیکری گئچدی. باخدیم جویز لاپ تزه آغاجدان درینیب سویولانا اوخشاپیردی. قارقایا گۆزوم ساتاشاندا حیس ائتدیم کی، او حیرصلی-حیرصلی منه باخیر. من ده اؤزومو الدن قویمادیم؛ گۆز تیکدیم قارانین گۆزترینین لاپ دبینه. او باخدى ، من باخدیم. او باخدى ، من باخدیم. نئچه دقیقه ائله ایشیمیز بیر- بیریمیزه گۆز تیکمک اولدو. قارقا عنادجیل منه باخیردی. من ده اوزدن گئندن آداما اوخشامیردیم. گۆز تیکمیشدیم گۆزترینه. او، هردن یانا باخیب جویزی سئیر ائدیردی. من ایسه جویزه باخمايیب ، داماغیمدا دادینی حیس ائدیردیم. بیلیردیم کی، یئریمدن ترپنسم قارقا قاجاجاق. من ایسه هله لیک اونون قاچماغینی ایسته میردیم. دوغروسو اونو قورخوتماق نیتینده دئییلدیم. ایسته ییردیم او جویزدن ال چکسین ؛ قورخودان یوخ ، کؤنولدن. بونا گۆره ده اونا باخیردیم. ایچیمده بیر حیس منه دئییردی کی، قارقادا منیم فیکریمی اوخویوبدور. او دا ایسته ییر من جویزه گۆزوم اولماسین. آخی حیطین باخچاسینده یئکه بیر جویز آغاجی وار.

حیسیمیز بیر-بیرینه توققوشوب بیزی بیر یاریشا دوغرو آپاریر. من اونا باخیرام، او دا منه باخیر. بیلیرم بو بیر یاریشیدیر. اؤز-اؤزمه دئییرم سن باخ من باخیم گۆرک کیم اوزدن گئدر. ایوانا آچیلان قاپینی آچیرام. قارقا اوچمور کی هئچ ، هله بیر قاریلدایر. جویزی الیمده حیس ائندده گۆردوم قارقا اوچوب اوزاقلاشدی. قلمه آغاجیندا اوتوراندایا باخیشیندا بیر آجیق ایله کدری گۆردوم. جویزی سیندیرماق اوچون اطرافدا بیر فایدالی شئی گۆرمدیم. اووچومدا جویزی سیخدیم. بیر چارت سسی چیخدی. قارقا اوچوب یئیندن نرده نین اوستونده لاپ منیم اوز به اوزومده اوتوردو. الیمده جویز ایکی بولونموشدو. یئنه او منه باخدی، من اونا باخدیم. گۆرسن من اونون یئرینده اولسایدیم عاقلیمدان نه گئچردی؛ یقین منیم ده بیر ایش الیمدن گلمزدی. اونون وریندن دوشونورم: "او، منیم حاققیم ایدی. اونو الده ائتمک اوچون اوچوب آغاجین یئلده اسن بوداغینا اوتورموشدوم. زحمتله، دقتله بیر یئتیشمیش جویزی تاپیب، زققوم دادینا باخمایاراق اونو قاییقدان ائتمیشدیم. سونرا اونو دیمدیکده دامن اوستونه آپارمیشدیم کی، آجلیغیما سون قویوم. بیلیمیرم نجه اولدو کی بیردن دیمیدگیمن یووارلانیب آشاغیا ساری اوچدو. هله بیلیمیرم بو یئکه کیشی هاردان تاپیلدی و منیم جویزیمه گۆز تیکدی. داها چوخ اونا گۆره آجیغیم توتوردی کی، اونون حیطینده جویز آغاجی اول-اولا منیم مالیما گۆز تیکیدیر."

ایسته دیم ایچینی آرتداییم. بیردن قاریلدادی. اونا ساری باش قالدیردیم. گۆزونون دییینده بیر آجیق آلولانیردی. من اونا باخیرام ، او دا منه باخیر. ائف-ائفن زنگی چالیندی. قارقایا باخدیم. جویزی اونا ساری آتدیم و ایچری گیردیم. بیر نجه آندان سونرا یئنه پنجره یه ساری قاییتدیم. قارقا ایکینجی یارینین ایچینی چیخارتدی و دیمدیگلدی. سونرا دونوب منه باخدی. گۆزلرینین دییینده بیر اودوش، سنوینج کولهیی اسیردی....